

**Tolosako udalaren adierazpen instituzionala Euskaltzaindiaren sorreraren 100.
Urteurrenean**

'Baina guk, hizkuntza larreakoa, nahi haugu ere noranahikoa'

Aurten ehun urte beteko dira Euskaltzaindia sortu zenetik. Mende oso bat Akademiak euskararen alde, bai bera ikertzen, bai bera zaintzen.

Orain ehun urte, orduko euskal herritarren ordezkari instituzionalek ikusi zuten beharrezkoa zela erakunde bat, euskararen bidea prestatu eta bidean aurrera zuzen jarraitzen gidatuko zuena. Erakunde hori pertsona adituek osatu behar zuten. Akademiak euskararen desberdintasunak aztertuko zituen, hutsuneak bete, hitzen forma eta esanahia finkatuko zituen, eta idazteko modu bakar bat ezarri; euskalkietatik bat ere baztertu gabe, haiek elkarren osagarri eta elkarren aberasgarri erabiliko zituen, eta, atzenean, erakunde horrek hizkuntza garbia, akasgabea eta jakintza-arlo guztietarako egoki eta erabilgarria izango zena ezarriko zuen. Horrela irudikatu zuten Euskaltzaindia orduko Araba, Bizkaia, Gipuzkoa eta Nafarroako ordezkari instituzionalek euskararen esparru osorako akademia bat eragin zutenean.

Era berean, aurten 50 urte bete dira Euskaltzaindiak Arantzazuko Batzarra antolatu zenetik. Batzar hura hartu ohi da euskara batuaren abiapuntu-datatzat. Euskara batua sortzeko asmoak, ahaleginak eta saiakerak lehenago ere hasiak ziren —euskara batuaren sorreran bereziki esanguratsua izan zen 1964. urtean egindako Baionako Biltzarra—, baina Arantzazuko Batzarra izan zen euskara batua sortzeko prozesuari abiapuntu sendo eta formal garrantzitsua eman ziona.

1968az geroztik euskara batuak ibilbide bizkorra eta sendoa osatu du, eta gizartearen esku utzi du euskara normaltasunez erabili ahal izateko tresna emankorra eta eraginkorra, erabilera arloa edo eremua edozein dela ere.

Euskarak egun duen egoera ezin da entenditu euskararen Akademiaren lana gabe. Izan ere, orain dela berrogeita hamar urte, Arantzazun egindako batzarrean, gaur egungo euskara batuaren lehen oinarriak finkatzen hasi zen Euskaltzaindia. Lizardi poetak kantatutakoa —*Baina nik, hizkuntza larreakoa, nahi haunat ere noranahikoa'*— egia bihurtzeari bide eman zion batzar hark.

Izan ere, euskararen garapenean ezinbesteko izan diren baliabideetan —literatura, hedabideak, ikastetxeak, unibertsitatea, administrazioa, euskalduntze-alfabetatzea, kultur ekoizpena...— euskara batua nahitaezko tresna izan da administrazio, gizarte-eragile eta herritar ororentzat, guztia Euskaltzaindiaren eraginpean.

Bestetik, seinalatzekoa da atzen 100 urteotan euskararekin eta euskal kulturarekin Tolosak agertu izan duen konpromisoa, azpimarratzekoa delarik Euskal Berpizkundean Tolosak eta tolosarrek jokatu zuten paper inportantea.

Euskaltzaindiaren lanak merezi duen aitortpena zabaltzeko, gaur eta hemen, Tolosako udaleko Batzar Aretoan Akademiaren osoko bilkurak Euskaltzaindiaren lana aintzat hartu nahi du.

ERABAKIA

Tolosako udalak, Tolosako herritarren ordezkari moduan, Euskaltzaindiaren ibilbidea eta jardun akademiko eta historiko osoa aitortzen eta eskertzen du eta bereziki euskara batuaren garapenean egin duen eta egiten diharduen lan eskerga.

Tolosako udalak bat egiten du Euskaltzaindiaren mendeurren ekitaldiekin eta tolosar guztiei gonbita egin nahi die bat egin dezaten Euskaltzaindiaren ehungarren urte hau dela-eta izango diren ekitaldiekin.


Tolosako udalak Euskaltzaindia gonbidatzen du mendeurrenaren ospakizunen harian Tolosan ekitaldi bat antola dezan. Udalak ekitaldi hori egiteko beharrezkoa izan daitezkeen baliabideak jarriko ditu.

DIKTAMENA

Euskara Batzordea 2018ko urriaren 25ean bildu ba eta proposamen hau Osoko Bilkuran onartzea erabaki du batzordekideen boto hauekin:

- Jokin Azkue ALDEKO BOTOA
- Onintza Lasa ALDEKO BOTOA
- Maite Ruiz de Egilaz ALDEKO BOTOA

Esan beharra dago, Batzordean aurkeztu baino lehenago, alderdi politiko guztiek adostutako adierazpen instituzionala dela.

A handwritten signature in black ink, appearing to read 'Jokin Azkue', is enclosed within a hand-drawn oval. The signature is written in a cursive style.